

0523

## Акафист

### Прп. Блгв. Кн. Евфросинии Полоцкой

#### Кондак 1

**Избрáнную Христову невесту песньми восхвалим днесь, вернии, Евфросíнию;/ сия бо княжна, дом отчий оста́вльши/ и во иночестве поживши дóбре,/ мно́гая управила есть ко спасéнию;/ во Иерусалиме плотию престáвльшися,/ во Иерусалим горний Духом преселися и тамо присно за ны молится./ Ейже тако возопиим:// Радуйся, Евфросиние, невесто Христова всечестная.**

#### Икос 1

Ангельски поживши, преподобная, постническим житием угодила еси Христу и небесныя радости причаститися сподобилася еси по скончании. Темже с горних высот призри на ны, тако ты величающая:

**Радуйся, Российския земли похвалó;/ радуйся, отрасли славная от рода Владимира равноапóстольнаго.**

**Радуйся, именитых родителей чадо богоизбрáнное;/ радуйся, голубице непорóчная.**

**Радуйся, девственнице чíстая;/ радуйся, инокиням утешéние.**

**Радуйся, ко Иерусалиму небесному путеводíтельнице;/ радуйся, благочéстия звездó.**

**Радуйся, заступнице к тебе притека́ющих;/ радуйся, целительнице недугов незрíмая.**

**Радуйся, ходáтаице/ за ны тéплая.**

**Радуйся, Евфросíние,/ невесто Христова всечестна́я.**

#### Кондак 2

Видение бе радостное, егда по рождении твоём принесоста ты, преславная, родителя твоя во храм Господень: тамо бо в купели крещения от первороднаго греха омылася еси погружением;/ и мира священным помазанием ты, яко отрасль младую, иерей привил есть ко Христу, да поеши Ему нынче со избранными Его: Аллилуиа.

#### Икос 2

Разумом, свыше просвещенным, и чистым сердцем Христови от юности вручила еси себе, Предиславо;/ почасту во храм притекающая, в горнице во трудах присно пребывала еси. Темже ты убожаем:

**Радуйся, Христови обрученная от купели крещения;/ радуйся, миром благодатным запечатлénная.**

**Радуйся, Духа Свята вместилище чíстое;/ радуйся, Тем умудренная во спасéние.**

**Радуйся, во благое свыше укреплénная;/ радуйся, разум просветившая молíтвою.**

**Радуйся, совесть стяжавшая крѣпкую во благѣм;/ радуйся, от младости уведевшая пути благочестія.**

**Радуйся, уклонила бо еси пути гѣбельнаго;/ радуйся, трудолюбивая отроковице.**

**Радуйся, юных дѣв/ российских красотѣ.**

**Радуйся, Евфросініе,/ невесто Христова всечестная.**

### **Кондак 3**

Силою Вышняго укрепленная, возлюбила еси, преподобная, научение книжное и тому прилежала еси;/ мудрость же книжную постигши, паче прочих божественныя книги избрала еси, и яже умудрити могут во спасение всякаго человека, усердно почитала еси, сладце поющи Господеви: Аллилуиа.

### **Икос 3**

Имать днесь обитель твоя отроковицы многи и млада, научению книжному зде вданная. Сего ради усердно молим тя, всехвальная, призри на тья и умудри я во спасение, да ты величаем:

**Радуйся, ключ мудрости взыскавшая;/ радуйся, яко художество книжное постигла еси от младости.**

**Радуйся, тем отверзшая двери богопознания;/ радуйся, Священное почитавшая Писание.**

**Радуйся, от сего узревшая мира сущаго сотворение;/ радуйся, умиленная неизреченным Христовым снисхождением к падшему роду нашему.**

**Радуйся, возлюбившая возлюбльшаго нас Господа;/ радуйся, Тому Единому поработати возжелавшая.**

**Радуйся, последи в чертог славы Его всеельшаяся;/ радуйся, девственнице, юным девам незримая споспешнице в научении.**

**Радуйся, свѣтільниче/ благочестія и знанія;/**

**Радуйся, Евфросініе,/ невесто Христова всечестная.**

### **Кондак 4**

Бури житейских бед и напастей бежавши, преподобная, паче брака честна житие девственное возлюбила еси и от именитых женихов уклонила еси, отроковице, да единому Жениху Небесному, Христу, поработавши, поющи Ему: Аллилуиа.

### **Икос 4**

Слышала еси, преподобная, яже Апостол рече: глаголю безбрачным и вдовицам — добро им есть, аще пребудут, якоже и аз;/ аще ли же ни, да посягают;/ не оживый бо ся печется, како угодити Господеви;/ и сему поревновала еси. Темже ты величаем:

**Радуйся, девственнице чистая;/ радуйся, путь иноческаго житія избравшая.**

**Радуйся, яко жребий девства прияти и вместити возмогла еси Божию благодатию;/ радуйся, мирскаго треволнения избѣгшая.**

**Радуйся, тихаго пристанища взыскавшая;/ радуйся, Марии Лазареве подражавшая.**

**Радуйся, яко во храме, аки при ногу Христову, приметалася еси;/ радуйся, яко лику мучениц и преподобных жен приобщилася еси.**

**Радуйся, презревшая лепоту мира тленнаго;/ радуйся, неизреченныя радости в мире горнем днесь причастице.**

**Радуйся, праведнаго/ жития образе.**

**Радуйся, Евфросиние,/ невесто Христова всечестная.**

### **Кондак 5**

Бога точно боящися, не утрашилася еси, Евфросиние, тяготы жития иноческаго, кров же оставльши отчий, во обитель притекла еси и облещи тя во ангельский образ умильне игумению молила еси, да не обязавшися куплями житейскими, выну пети сподобишися Христови: Аллилуиа.

### **Икос 5**

Врача Небеснаго молила еси, всехвальная, да скорбь, родителема твоима отшествием учиненная, на радость преложится;/ оставила бо еси я, преподобная, да Христови послужиши и за рождших тя молишися. Темже ты хвалим достойно:

**Радуйся, избраннице Божия;/ радуйся, тайне, из отчаго дома отшедшая.**

**Радуйся, во обитель всельшаяся княгини Романовы;/ радуйся, возложшая руку на рало делания духовнаго.**

**Радуйся, брачный венец отложившая;/ радуйся, главу покрывшая кукулем незлобия.**

**Радуйся, одеждам брачным одежду нищеты предпоче́тшая;/ радуйся, со прятием вервицы, аки мечем, вооруженная словом Божиим.**

**Радуйся, крест Христов, аки знамя веры, приимшая;/ радуйся, яко не посрами ты Господь во уповании.**

**Радуйся, родителя бо, пришедшая ты видети, от писания тобою утешившаяся,/ в радости возврати́стася.**

**Радуйся, Евфросиние,/ невесто Христова всечестная.**

### **Кондак 6**

Проповедника Павла, иже рече: всяк подвижаясь от всех да воздержится, послушаючи, в посте и воздержании неослабно пожила еси, преподобная, во обители;/ суесловия бо бегала еси и, песньми псаломскими назидаящи, молилася еси, и в добрем изволении утверждающися, выну пела еси: Аллилуиа.

### **Икос 6**

Возсия благодать в подвизах жития твоего, Евфросиние всечестная;/ по некоем бо времени во град Полоцк преселилася еси, и при храме святых Софии в клетце мале подвижающися, книги божественныя переписовала еси и тако град ти присный полезным учением напаяла еси, слышащи от всех таковая:

**Радуйся, Полоцкое радование;/ радуйся, девам сияние.**

**Радуйся, звездо благочестия;/ радуйся, смирения исполненная.**

**Радуйся, послушанием утверждённая;/ радуйся, с молчанием скорби терпёвшая.**

**Радуйся, при храме бо, яко древле Богоотроковица, пожила еси;/ радуйся, мудрая княжно и инокине пречестная.**

**Радуйся, цвете по́стничества;/ радуйся, свете крото́сти.**

**Радуйся, упова́ния/ неложнаго испове́днице.**

**Радуйся, Евфросиние,/ невесто Христова всечестная.**

### **Кондак 7**

Хотяй спасти тобою жены и девы многия во иночестве, Владыка Христос сицеваго видения удостои тя, преподобная;/ в соннем видении узрела еси себе, Евфросиние, принесену в сельце к церкви Спасове, и Ангела ти рекшаго: zde ти быти подобает. Ты же абие от сна воставши, радостне пела еси: Аллилуиа.

### **Икос 7**

Новое чудо бысть: тойже бо Ангел явился святителю Или, повеле ему дати сельце то на вселение ти и церковь на молитву, еже и сотвори святитель абие. Сия поминающе, тако тя величаем:

**Радуйся, ангельски пожившая;/ радуйся, Ангела Господня узрившая.**

**Радуйся, сладкия беседы его причастице;/ радуйся, яко и пред святителем ходатай бэ о тебе.**

**Радуйся, Ангелом и на всех путех твоих храненная;/ радуйся, кровом крил его огражденная.**

**Радуйся, не преткнувшая ноги твоя о камень гордыни;/ радуйся, сего ради видения зрака ангельскаго удостоенная.**

**Радуйся, яко явился ти, иже зрит лице Отца нашего Небеснаго;/ радуйся, не прогневльшая хранителя ничимже суетным и греховным.**

**Радуйся, сего ради/ радостныя вести удостоенная.**

**Радуйся, Евфросиние,/ невесто Христова всечестная.**

### **Кондак 8**

Странник, кров узрев, радуется и, пришед, покой си приемлет. И ты, преподобная, радости исполнилася еси, при церкви на сельце водворившись со единою от инокинь, и ту основание обители твоя сотворила еси, отнюдуже Богови днесь возносится песнь великая, в вышних сугубо песнословимая: Аллилуиа.

### **Икос 8**

Вся весть Господь, и ничтоже тайно, еже не открыеться;/ ведый же вся, коемуждо от человек изволение дарует, да избрет кийждо путь жития, и якоже кто поживет, по житии коегождо скончавшаяся судит. Яже памятующе, тако тя хвалим:

**Радуйся, благий ярем Христов подъемшая;/ радуйся, по гласу ангельскому на место пустынно отшедшая.**

**Радуйся, точно книги с собою прине́сшая;/ радуйся, со едином одеянием бывшая.**

**Радуйся, с тремя малыми хлебы всельшаяся;/ радуйся, прочая вся оставльшая.**

**Радуйся, пустыни украшение;/ радуйся, яко сроднии за подвиг сей благословіша тя.**

**Радуйся, епископом Илиею утешенная;/ радуйся, яко вскоре к тебе многи инокини стекóшася.**

**Радуйся, яко и обитель/ славная ту устрои́ся.**

**Радуйся, Евфросіние,/ невесто Христова всечестна́я.**

### **Кондак 9**

Всемилоствиваго Спаса храм во обители создала еси и честными иконами украсила еси, преподобная, споспешствующей ти благодати Божией;/ древоделя бо на строение церковное некий глас буждаше, на скончание же храма дивне плинфы многи обретошася. Яже зрящи, со умилением пела еси: Аллилуиа.

### **Икос 9**

Ветия мудрая была еси, преподобная, памятовала бо еси слово Христово: иже сотворит едину заповедей сих малых и научит тако человеки, сей велий наречется в Царствии Небеснем;/ и поучаючи благочестию сестры своя, первое сия творила еси. Темже тя величаем:

**Радуйся, инокиням правило иноческаго житія;/ радуйся, яко в чистоте и целомудрии блюла еси юныя.**

**Радуйся, неложно старья почитавшая;/ радуйся, скорбным споспешнице в терпении.**

**Радуйся, была бо еси всем образ смирения и благолепнаго хождения;/ радуйся, обличительнице осуждения и многословія.**

**Радуйся, приятелище дара прозрения сердец;/ радуйся, вопрошающим мудрая советнице.**

**Радуйся, миротворице сварящихся;/ радуйся, добродетельми преукрашенная.**

**Радуйся, великая/ российская де́во.**

**Радуйся, Евфросіние,/ невесто Христова всечестна́я.**

### **Кондак 10**

Спасения ради и утешения Ефесскую икону Владычицы наша Богородицы испросила еси из Царяграда, преподобная, во град Полоцк. Обитель ину устроивши, тою иконою сию украсила еси;/ сестру же и две дочери братния, Кирианну и Ольгу, иночества обетами Христови обручила еси и во обителях твоих во спасение управила еси многия, поющи: Аллилуиа.

### **Икос 10**

Стеною крепкою от искушений явися смирение твое;/ вся бо ти повеленная совершивши, яко рабу неключиму вменила еси себе, преподобная;/ кротостию и тихостию нрава паче злата и бисера украсила еси душу твою. Темже ты величаем:

**Радуйся, слуго чистая Девы Пречістыя;/ радуйся, увеселила бо еси Полоцк чудным Божия Матере образом.**

**Радуйся, великое сокровище Российстей земли тако стяжавшая;/ радуйся, многия девы во обитель Божия Матере приведшая.**

**Радуйся, присныя ти на путь спасения привлéкшая;/ радуйся, мудрая управительнице во спасéние.**

**Радуйся, две обители, яко свечи, возжéгшая;/ радуйся, теми просветившая страну Пóлоцкую.**

**Радуйся, насадительнице древа íноческаго жити́я;/ радуйся, смирением утаевавшая высоту твоих пóдвигов.**

**Радуйся, строительнице/ Росси́йския землі.**

**Радуйся, Евфросíние,/ невесто Христова всечестна́я.**

### **Кондак 11**

Песньми восхваляюще тя, терпению твоему дивимся, преподобная;/ всякия бо труды и скорби понесши, последи во Святую Землю странствие прияла еси, идеже, по желанию твоему, и скончати́я приведе ти Господь;/ тамо бо к Нему в старости маститей преселилася еси, подвиг добрый совершивши, с песнию: Аллилуиа.

### **Икос 11**

Светозарная луче земли Российския! Аще плотию представилася еси от нас, преподобная, обаче духом с нами присно пребываеши. Во храме, тобою созданном, молящися и кресту, от тебе устроенну, покланяющися, молим тя, прими от нас сицевыя хвалы:

**Радуйся, древняя России сия́ние;/ радуйся, оныя днесь вели́кия похвалó.**

**Радуйся, славная Земли Святыя от севера пришéльнице;/ радуйся, гробу Христову поклонитися сподóбльшаяся.**

**Радуйся, лампаду ту от земли Российския возжéгшая;/ радуйся, у гроба Христова ко Христу отшédшая.**

**Радуйся, у онаго крест земнаго жития твоего оста́вльшая;/ радуйся, Святыми Тайнами при скончании напúтствованная.**

**Радуйся, на Небеси от святых угодник радостно срéтенная;/ радуйся, венцем славы от Небеснаго Жениха увенча́нная.**

**Радуйся, мудрая де́во,/ вшедшая в чертог Жениха Небеснаго со славою;**

**Радуйся, Евфросíние,/ невесто Христова всечестна́я.**

### **Кондак 12**

Благодати причастнице, усердно молим тя, Евфросиние всехвальная, пролий теплую твою молитву ко Всевышнему за всю землю нашу православную, да мудростию и чистотою жития народнаго, яко дочь избранная, будет во языцех земля наша, и чада ея да внидут в горняя селения, поюще Богови: Аллилуиа.

### **Икос 12**

Поюще тя, яко заступницу нашу теплую, инокиням же и девам обители твоей покров и утверждение, радуемся о тебе, преподобная, и молитвами твоими просимая приемлюще, с любовью величаем тя сице достойно:

**Радуйся, яко мощи твоя, во отечество принесенныя, процветоша нетлѣнием;/ радуйся, всехвальная, равноапостольнаго Владимира правнуко.**

**Радуйся, собеседнице равноапостольныя Ольги и всего богосветлаго лика праведных жѣн;/ радуйся, всельшаяся в скінію святыхъ.**

**Радуйся, незримая о нас ходатаице;/ радуйся, болящих врачевание дѣвное.**

**Радуйся, печальных утешение неложное;/ радуйся, отрадо скорбящихъ.**

**Радуйся, опоро ты призывающихъ;/ радуйся, заступнице наша теплая у Христа.**

**Радуйся, дѣвная,/ верою чтущихъ ты путеводительнице ко спасенію.**

**Радуйся, Евфросиніе,/ невесто Христова всечестная.**

### **Кондак 13**

О всехвальная мати наша, Евфросиніе всечестная! Моли за ны Господа и Матерь Его Пречистую, да укрепит наша немощныя силы и во спасение управит, юныя в чистоте соблюдет, девствующія укрепит в подвизе, во браце сущія в любви и мире усовершит, уврачует недужныя, просветит омраченныя, умершия простит и вся в чертоги Своя управит, идеже выну Ангели поют песнь хвалебную: Аллилуиа.

*Этот кондак читается трижды, затем икос 1-й и кондак 1-й*

### **Молитвы преподобной благоверной княгини Евфросинии Полоцкой**

#### **Молитва первая**

О преподобная и приснопамятная, всехвальная мати Евфросиніе, Ангеле во плоти, богоизбранный сосуде Святаго Духа, Церкви Христовы похвало и украшение, монашествующих славо и утверждение, отечеству, обители твоей и всей стране Россійстей помощи, покрове и защитнице! Ты еси, яко древо, насажденное при исходящих вод, плоды добродетелей твоих и благодатными дарованиями Святаго Духа украшенная, наставнице делом и словом, избранная, непорочная и добрая. Услыши ны, молящіяся тебе и призывающія имя твое, имаши бо дерзновение у Господа. Испроси нам преспеяние в жизни добродетельней, огради сердца наша верою, надеждою и любовью и страхом Божиим. Подай нам помощь в трудех и скорбех наших и, якоже попечение имела еси в житии твоём о обители твоей и иночествующих, тако и ныне потщися о нас, благопоспешити нам во всем: и обитель твою огради миром и защити от враг видимых и невидимых, да преуспеваеи и процветаеи в добродетелех. Изми ны от всякия нужды и тесноты, от лютых болезней и от нечаянныя смерти и приведи ны ко истинному покаянію при исходе из жизни сея;/ испроси нам у Господа Бога кончину мирну, безболезненну, непостыдну, Святых Тайн причастну и преведи ны чрез мытарства воздушная, да не похитят нас истязателие грознии по грехом нашим, но да твоим заступлением и помощію возможем безбедно пройти истязание воздушное, и милость получитьи, и предстати неосужденно страшному Престолу, и на Страшнем Судищи сподобитися одесную стати Праведнаго Судии, и наследовати праведныхъ часть. Ей, госпоже, всечестная мати, преподобная Евфросиніе, помози нам молитвами твоими, огради нас и заступи от всякихъ козней вражиихъ, да сподобимся преити время жизни сея непреткновенно и спасение получитьи молитвами твоими у Христа Господа, Егоже и сподобимся пети и славословити со Безначальнымъ Отцемъ и со Святымъ Духомъ во веки вековъ. Аминь.

### **Молитва вторая**

О преподобная мати Евфросиние! Услыши ны молящияся тебе;/ испроси нам, рабам Божиим (имена), преспеяние в жизни добродетельней;/ огради сердца наша верою, надеждою и любовью, и страхом Божиим, подай нам помощь во трудех и скорбех наших, изми ны от всякия нужды и тесноты, от лютых болезней и от нечаянныя смерти, и приведи ны ко истинному покаянию при исходе от жизни сея;/ испроси нам у Господа Бога кончину мирну, безболезненну, непостыдну, Святых Тайн причастну;/ и проведи ны чрез мытарства воздушная. Ей, преподобная Евфросиние, помози нам молитвами твоими: огради нас и заступи от всяких козней вражиих, да сподобимся спасение получитьи у Христа Господа, Егоже и сподобимся славословити, со Безначальным Отцем и со Святым Духом, во веки веков.